

Pusat Subfertiiliti Pertama Negara bantu tingkatkan kadar pertumbuhan penduduk

Rabu, 29 November 2023

Nasional

7

Pusat Subfertiiliti Pertama Negara bantu tingkatkan kadar pertumbuhan penduduk

Langkah tepat tangani penurunan kadar kesuburan di Malaysia

Kuala Lumpur: Pusat Subfertiiliti Negara (PSN) pertama di Malaysia yang bakal dibina di Shah Alam, Selangor pada tahun depan dan dijangka beroperasi pada 2030 akan menyediakan pelbagai kemudahan perkhidmatan kepakaran rawatan kesuburan menyeluruh kepada pasangan yang memerlukan rawatan kesuburan dari seluruh negara.

Pusat itu mengandungi pelbagai komponen perkhidmatan subfertiiliti dan mempunyai sektor pentadbiran, kepakaran dan perawatan klinikal serta makmal diagnostik yang menempatkan pelbagai kepakaran dalam memberi perkhidmatan subfertiiliti terbaik negara.

Menteri Pembangunan Wanita, Keluarga dan Masyarakat, Datuk Seri Nancy Shukri, berkata pembinaan pusat yang menyediakan khidmat rawatan kesuburan dan kesejahteraan keluarga secara komprehensif itu membabitkan peruntukan RM171 juta.

Beliau berkata, penubuhan pusat ini seperti diluluskan kerajaan dalam Rancangan Malaysia Ke-12 (RMK12) menyediakan khidmat rawatan kesuburan dan kesejahteraan keluarga yang komprehensif, termasuk berfungsi sebagai pusat koordinasi penyelidikan, teknologi rawatan terkini dan latihan kepakaran di Malaysia.

Katanya, PSN dilihat sebagai tepat pada masanya memandangkan sejak lima dekad lalu, kadar kesuburan penduduk negara mencatatkan penurunan daripada 6.7 orang anak bagi seorang wanita pada 1957 kepada 1.6 orang anak pada 2022, iaitu kadar terendah pernah dicatatkan negara.

"Penurunan kadar kesuburan di negara ini secara tidak langsung mempercepatkan proses Malaysia sebagai negara tua



Pusat Subfertiiliti Negara bakal dibina di Shah Alam tahun depan sedia pelbagai kemudahan perkhidmatan kepakaran rawatan kesuburan menyeluruh kepada pasangan yang perlukan rawatan.



menjelang 2044 apabila 15 peratus daripada keseluruhan penduduk mencecah usia 60 tahun ke atas.

"Jika kadar kesuburan terus menurun dengan kadar semasa dan tiada intervensi diambil bagi menangani situasi ini, penduduk negara ini dijangka mencapai jumlah maksimum 46 juta orang pada 2071 sebelum mengalami penguncupan penduduk pada tahun berikutnya.

"Seiring dengan penurunan kadar kesuburan, saiz purata isi rumah atau saiz keluarga di negara ini turut mengalami pengurangan, iaitu daripada 4.8 orang pada 1991 kepada empat orang pada 2014.

"Ini secara tidak langsung menggambarkan sumber sokongan sosial keluarga semakin berkurang dan terhad, terutama dalam menunaikan tanggungjawab

wab penjagaan terhadap warga tua," katanya.

15 resolusi dihasilkan

Persidangan Kependudukan Kebangsaan 2023 (PERKKKS 23) bertemakan Penduduk dan Keluarga Mampan, Membangun Malaysia MADANI yang diadakan di Putrajaya pada 21 dan 22 November lalu turut mengadakan sesi meja bulat mengenai isu kesuburan serta implikasinya terhadap pertumbuhan dan struktur penduduk negara ini.

Hasil persidangan itu, 15 resolusi dihasilkan yang akan dibentangkan dalam mesyuarat Jemaah menteri pada waktu terdekat.

Nancy berkata, Lembaga Penduduk dan Pembangunan Keluarga Negara (LPPKN) menawarkan perkhidmatan subfertiiliti sejak 1979 menerusi tiga klinik mengikut zon iaitu Klinik Subfertiiliti Pulau Pinang (Zon Utara), Klinik Subfertiiliti Kuala Lumpur (Zon Tengah) dan Klinik Subfertiiliti Johor Bahru (Zon Selatan).

Beliau berkata, perkhidmatan subfertiiliti seperti kaunseling, ubatan kesuburan dan prosedur khusus seperti *Intrauterine Insemination* (IUI) serta Teknologi Bantuan Konsepsi termasuk *In-Vitro Fertilization* (IVF) dan *Intra-Cytoplasmic Sperm Injection* (ICSI) ditawarkan pada kos berpatutan berbanding fasiliti swasta kepada semua pasangan berkahwin yang layak.

Bagaimanapun, katanya, setakat ini, fasiliti LPPKN ini hanya mampu menawarkan perkhidmatan subfertiiliti kepada 6,000 hingga 7,000 orang setahun.

"Menerusi pembinaan PSN yang bakal menjadi pusat seheutit, ia menyediakan perkhidmatan

subfertiiliti lebih komprehensif dan menyeluruh bagi pasangan yang memerlukan rawatan tenaga pakar dalam bidang kesuburan menerusi teknik rawatan terbaru dan moden.

"Perkhidmatan subfertiiliti ditawarkan pada kos kompetitif dan mampu kepada pelanggan, terutama golongan B40 dan M40 mempunyai kekangan menjalankan rawatan kesuburan," katanya.

Fasiliti lebih moden

Nancy berkata, PSN bakal menyediakan perkhidmatan subfertiiliti sekurang-kurangnya tiga kali ganda pelanggan setahun berbanding sekarang memandangkan lebih ramai tenaga pakar dan fasiliti lebih moden disediakan untuk menampung keperluan mereka yang bermasalah kesuburan dalam negara.

Beliau berkata, PSN juga menjadi pusat menyelaras Data Subfertiiliti Kebangsaan daripada agensi kerajaan dan swasta supaya masalah kesuburan dalam negara lebih terkawal dan dipantau kerajaan.

"Selain menyediakan perkhidmatan subfertiiliti, PSN bakal menjadi pusat melatih pengamal perubatan supaya lebih kompeten dalam bidang itu dengan anggaran melahirkan sekurang-kurangnya 10 pakar dalam bidang subfertiiliti setiap tahun.

"Ini kerana PSN juga bakal mengumpulkan pakar kesuburan dari seluruh Malaysia, sekali gus menarik perhatian warga asing mendapatkan perkhidmatan subfertiiliti bertaraf dunia pada harga kompetitif, sekali gus menyumbang kepada nilai Keluaran Dalam Negara Kasar (KDNK) melalui pelancongan kesihatan," katanya.



Kementerian Pembangunan Wanita, Keluarga dan Masyarakat komited dalam menyediakan perkhidmatan untuk meningkatkan tahap kesuburan rakyat.